

Amigonan ta recordando Oslin Scholten:

28 September 1021-9 Februari 2005



Na aña 2001 Oslin A. Scholten a ricibi e boton di 50 aña como miembro di Logia El Sol Naciente.



Anton Oslin Scholten tempo e tabata Managing Director di Winkel Handel Mij.



Na maart 1955 Celia Cruz a bin Aruba pa prome bes. Celia tabata acompaña pa Sonora Matancera na un fiesta bailabel na Club Caribe. Oslin Scholten, Director di Winkel Handel Mij. a sponsor transmision di e fiesta pa Radio Kelkboom. Na final di e fiesta Evelina Croes, e prome reina di carnaval di Aruba a presenta un bouquet na Celia na number di Winkel. Tras di e microfon por mira

ORANJESTAD (AAN): Diasabra (Februari 12, 2005), cu un ceremonia solem, e miembronan di Logia El Sol Naciente, dirigi pa nan venerabel maestro Sr Karel Wever, a despidi di nan ruman Anton Oslin

Scholten na cementerio masonico "Acacia" Brother Oslin tabata e miembro local mas bieu di su logia. El a worde inicia como Mason den El Sol Naciente na 1946 y el a keda miembro te dia cu el a fayece.

Nada straño. Su tata, Sr.

Anton "Shon Ton" Scholten tabata un di e fundadornan di El Sol Naciente y e mes a sirbi di Venerabel Maestro 1954 - 1955

Mientras cu e ceremonia tabata tumando lugar mi pensamentonan a bay back hopi aña y mi kier a comparti algun informacion cu esnan cu no sa ken tabata Oslin Scholten.

Cu relativamente poco educashon formal, Oslin a cuminsa su carera profesional na LAGO. Despues di poco tempo el a bay traha pa Hollandse Bank Unie caminda e tabata responsabel pa tur correspondencia cu dreña y sali. Como HBU no tabatin bode, Oslin mes mester a hiba tur carta postkantoor y reparti tur carta cu dreña. Oslin a realisa cu no tabatin un futuro den e trabao aki y el a cuminsa studia boekhouden. Despues di poco tempo el a haya empleo na Aruba Trading Co., caminda el a bira hefe di Boekhouding. Na aña 1954 e famia Winkel di Curaçao a pidi Oslin pa asumi e posicion di Managing Director di Winkel Handel Mij. (Aruba). E tempo ey Winkel Handel Mij. tabata un di e empresanan mas grandi di Antiya Hulandes.

Oslin tabata un director hopi dinamico y inovativo. el a regla pa Winkel patrosina transmision di e fiesta bailabel na Club Caribe caminda a Sonora Matancera a toca prome bes cu nan a bin Aruba. Den e añanan di infancia di carnaval na Aruba, Oslin a sostene hopi aña cu carosa patrosina pa productonan cu Winkel tabata representa. Tambe

Winkel a sponsor diferente ekipo di baseball y softball. Como Mason y Director di Winkel, Oslin a haci hopi pa caridad sin duna publicidad. Lamentablemente, na 1974 Oslin mester a tuma pensioen di Winkel pa via di su salud.

Oslin tabata un gran deportista tempo e tabata hoben. Como miembro di Club Caribe e tabata un di e pioneronan di diferente sport cu a cuminsa na Aruba e tempo ey. Tempo cu korfbal a worde introduci na Aruba, Oslin tabata den e prome ekipo cu a hunga. Oslin tabata un streya den e ekipo Caribe "A", e prome team di basketball cu a hunga pafor di Lago Colony. Na aña 1942 cu e tropanan escoces a

introduci hockey na Aruba, Oslin tambe a hunga pa e ekipo di Caribe bao di Lt. Munro. Pero pa mi Oslin su logronan mas grandi como deportista tabata pichando pa e ekipo di softball di Club Caribe. E tempo ey e gran rival di Caribe tabata e ekipo di Aruba Jrs. cu Francisco "Chico" Romero como nan picher. E weganan di diadomingo mainta na e tereno caminda awor ta Postkantoor tabata atrae masha hopi hende.

Nos ta recorda Oslin como un bon comerciante, un bon deportista, un bon persona y un bon Mason. Cu E Gran Architecto di Universo tuma nos ruman Oslin den su reino y dune paz eterno.